



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

tiryimyim@aolima

tir yimyim

TAPAK 8

Gujarat CM, Vijay Rupani-i menden toktsü

Taliban-i takok anguba ajanga tang telok ajungmesotsü: UN Chief



VOL. XVIII NO. 330 (ADOK 330) DIMAPUR

AMUNGNÜ (SUNDAY)

RONGJUI (SEPTEMBER) 12, 2021

₹ 5.00

## COVID-19 Nagaland: Puteter dang nungi taneptsü angur teimba

Kohima, September 11, 2021

(TYO): Nagaland nung anogo asemnü atongtepa COVID-19 puteter dang nungibo taneptsü angur teimba liasü. Tanü COVID-19 puteta alir nisung 44 taneptsü angur aser 39 dak putet. "Tesüiba ghonda 24 tsüingda nisung 39 dak COVID-19 putet. Parnokji Dimapur nung 30, Kohima o Phek nung asemsem (3), Mokochung nung 2 aser Wokha nung 1 lir. Parnok züingsema nisung ajak agi 30,594 kümogo.

"Kasa mapang COVID-19 puteta alir nisung 44 taneptsü angur. Parnokji Dimapur nung 21, Mokochung nung 15, Kohima nung 5 aser Phek nung 3 lir. Parnok züingsema taneptsü angur ajak agi nisung 28,388 kümogo aser ibaji 92.78% lir. Tang nisung 650 anepaludar" ta Dr Kikon-i metetdaksü.

Honibarnü COVID-19 puteta alir nisung ana asü. Dimapur aser Kohima nung kaka asü aser tena züingsema tasür ajak agi 636 kümogo, ta paisa shisem.

"Hokolbar tashi nung nisung 669,123 nem COVID-19 vaccine indang dose 921,702 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,859, healthcare workers 15,993, arishi küm 45 ser temapur 194,913 aser arishi küm 18 nungi 44 tsüingda alir 397,358 lir" ta paisa ashi.

"Vaccine agirtem rongnungi nisung 252,579-i dose anaprong agiogo. Parnokji frontline workers 45,191, healthcare workers 13,035, arishi küm 45 ser temapur 120,760 aser arishi küm 18 nungi 44 tsüingda alir 73,593 lir" ta Dr Thurr-isa ashi.

## DCCF-i Dimapur DC office belena meyoktsü

Dimapur, September 11, 2021 (TYO): Dimapur Deputy Commissioner indang office Chumukedima-i belena meyoktsü ta Dimapur District Citizens' Forum (DDCF)-i maneni telemteba agishiogo.

Honibarnü DCCF rongdak senden ka amendang August 25, 2014, June 5, 2015 aser April 6, 2021 anogotem Nagaland sorkar dang Dimapur Deputy Commissioner indang office complex tasenbai belena meyoktsü ta shidi züluba ama tanüa telemteba agiogo.

Iba onük atema Dimapur nung alirtemi ola adoktsü aser Chumukedima-i DC office belena meyoktsü, ta Media Cell, DCCF indang sangdong ka nung ashi.

Nagaland sorkari nübortem ola adokba angatsüla kechiyong democratic lintük ka nung sorkarji nübortemi akümer aser nübor asoshi lir, ta parnokisa ashi.

"DC Complex tasenba nung Additional Deputy Commissioner (ADC) tasen shimba atema tenüngsang agütsür. Iba ya district renlokba aser ainba indang kuli lir lir aser Dimapur district kübok Chumukedima circle nung alirtem kanga ajangzüksü" ta DDCF-isa metetdaksüogo.

Külen, Nagaland sorkari town/municipal tesemtem nung non-cadastral land nungi cadastral survey land akümtsü atema lenmang lapoktsütsü ayongzüker. Iba mapa ajanga tarutsü nung terenlok mapa sadema inyaketsü, ta DCCF-isa ashi.

Maneni, DCCF-isa Nagaland state sorkar dang Peren o Dimapur tsüingda district arrtsü timi ladangtsü mepishia metetdaksü. Iba maparen nung sorkari shinga tsütsü meshii aser yimtem/ CSOs/ administration dena angateteptsüla, ta DCCF-isa sangdong nung metetdaksü.

## Assam nung "disturbed area" atsülanger

Guwahati, September 11, 2021 (Agencies): Assam sorkari Armed Forces (Special Powers) Act (AFSPA) kübok ita trok atema "disturbed area" mapang atsülangerogo.

Assam sorkari August 28 nungi tenzüker ita trok atema state ajanga 'Disturbed Area' ta sangoktsür" ta Honibarnü sorkari sangdong ka nung ashi. Assam nung AFSPA ya November 1990 nung benok

aser iba sülen nungi state sorkari meyipa repringshir ita trok shia atsülanger arur.

Northeast nung AFSPA ya Assam, Nagaland, Manipur (Imphal Municipal Council Area maden), Arunachal Pradesh kübok Changlang, Longding aser Tirap district tem aser Arunachal Pradesh nungsa Assam den arrtsüa aliba police station 8 nung benoka lir.

## Nübortemi lenirtem dak temulung melemi kümogo : NSF tir



Dimapur Naga Students' Union nung kümsük küm 2021 nungi 2023 tashi inyaksü pur mendenpurtem tir Wb. Moayanger Jamir ( abelen nungi tanabuba)-i anir tenangzükba agiba noksa nung angur. (September 11, 2021).

Dimapur, September 11 (TYO) : Tanü tensa Naga nung loktiliba nung nübortemi lenirtem dak temulung melemi kümogo, joko asenok melongjemtetra majuruteptetsü ta Naga Students' Federation (NSF) tir Wb. Kegwayhun Tep-i metetdaksü.

Pai iba o ya tanü Küptoknü yangi IMC hall nung Dimapur Naga Students' Union (DNSU)

lokten senden den repsema tematiba takok angur kaketshirtem nem tenüngsang agütsüba sentong nung jembidang metetdaksü. Akhi tejen putu nung Nehemiah leniba nung Yihuda nungertemi Yirusalem yimti yanglushitet, kechiyong pai Tsüingrem dak amang aser par nübortemi pa dak temulung alemtsüsa ali. Iba amaji asenok Naga nung rongnunga

kati ka dak temulung lemettsüsa asenok alitsüla ta NSF tirisa ayongzük.

Paisa Dimapur nung alir Naga nung kaketshirtem dang Dimapur ya Nagaland süngküm asünungji, tangar dang nungi khuret talila bena Naga lima aser nübortem temeten kümzüka ayutsü asoshi ajungshi,

(Maneni tapak 2 nung...)

## Sep 16 nü Dimapur nung shishilembadak ajak shibangtsü

Dimapur, September 11, 2021 (TYO): Dimapur Chamber of Commerce & Industry (DCCI)-i September 16, 2021 nü dokantem aser shishilembadak ajak shibangtsü telemteba agiogo.

DMC-i check gates nung taxes/fees agiba anema iba anogo nung Dimapur-i khu bener aruba dena noktangtsü, ta DCCI-i Honibarnü sangdong ka nung metetdaksü.

Telok balala den sorkar agency temi ozüngi memelaba tax onsara saruba aser meshiba ajanga shishilembartemi khuret jenti ajurur. Iba atema state sorkari teinyaksü shitak meinyaker aser ano tax aika saruba azüoktsü atema tenangzükba ka magir. Anungji state sorkari mapa kecha meinyakba atema tejashi sayua shishilembartemi anogo ka 'total shutdown' asütsü aser iba ya lungkak aitiba mezüingbuba shilem lir" ta DCCI-isa ashi.

Sorkari shishilembartem

indang khuret atema mapa kecha meinyakra DCCI-i ano tarutsü nung lungkak aitiba sentong tuluba agitsüsa akümtsü, ta parnokisa ashi.

"Lungkak aitiba mezüingbuba shilem nung Confederation of Nagaland Chamber of Commerce & Industry (CNCCI) aser district chambers ajaki yariteptsü mepishir" ta DCCI President Akashe Zhimomi-i sangdong nung ashi.

"Ozüng alema tax onsara saruba khuret ajanga state nung alir senso shia dak kongshir anungji public-ia onok pusema nungitsü mepishir" ta DCCI-isa metetdaksüogo.

CNCCI: Yashi Confederation of Nagaland Chamber of Commerce and Industries (CNCCI)-is state sorkar dang Nagaland nung shishilembabaren ajanga shibangtsü ta amokmerenogo.

State sorkari tax onsara saruba khuret maziokra parnoki lungkak aittsü ta CNCCI-isa ashi.

"Naga yimten teloktem den

municipal aser town councils dena sorkar agency balalai tax saruba ajanga shishilembartem kanga timtemer" ta CNCCI chairman Dr Kheugha Muru aser general secretary Dr Seyievilie Mor nati Nagaland Chief Secretary J Alam dangi shidi ka zülu.

Parnoki sorkar den aiben iba tebilemtsü lemsatepogo saka sorkari temolung magütsür, ta CNCCI-isa ashi.

CNCCI-i state sorkar nem takhangba onük asem agütsüba nung "GST inakyim nung 'One Nation, One Tax' kübok tax ajak ka dang kümogo anungji sorkari tax talila magitsüla" ta ashi.

Sorkari item tax aser ano municipal o town council temi GST kübok adenba items nung fee meshiba anentsüla ta CNCCI-isa metetdaksüogo.

Nagaland nung check gate balala nung government departments/agencies-i GST kübok adenba atema tax agiba anentsüla, ta parnokisa ashi.

## GST sen ajanga Foothill Road renemtsüla: RPP

Dimapur, September 11, 2021 (TYO): Nagaland Foothill Road Coordination Committee (NFHRCC)-i Nagaland state sorkar saksalemdaksüba atema tenüngsang agütsür ta Rising People's Party (RPP)-i metetdaksü.

Nagaland sorkari Foothill Road atema süoki ia mebilemi alidang CSOs aser kaketshir teloktemi nungita NFHRCC-i sorkar nem mapang atakzüksüba ajanga parnok saksalemdaksüogo, ta RPP-i ashi.

Doyang nung apu aser tanga mapatem atema sen crore 20 lemzüksüba pelaa agizüker saka sorkari sen mali ta tatemtsü mamtsüla, kechiyong 2017 nungi Nagaland nung GST inakyim tenzüksüba ajanga sorkari sen aika angur. Anungji state sorkari teti Delhi nung oa meshimetsü asütsü melena Foothill Road mapatong renemtsü atema GST nungi anguba sen amshitsüla, ta RPP-i metetdaksü.

Nagaland sorkari tamakok aludaksüogo ta NITI Aayog-i kuli agütsüba sülen Centre-i

Foothill Road project atema sen magütsütsü akok. NITI Aayog osang ajanga Nagaland tenüng menükogo aser state sorkari tatemtsü aika shiaka tamakok aludaksüogo, ta RPP-isa ashi.

RPP-i Foothill Road atema 'crowd funding campaign' tenzüksüba maneni agitsü. Nisung kari iba campaign nung bendenba sen tim mesüi amshitsü ta tai tongloksür saka iba mapa ya milaap.org platform ajanga ketdangtsüa inyaker aser maparen nung tashishitsü kecha mali, ta RPP-isa metetdaksüogo.



MLA Moatoshi Longkumer-i Honibarnü Ao Senden Riju, Purana bazaar nung nungshilong ka lapoktsüogo. Iba sentong nung NLA Speaker Sharingain Longkumer, Imtisungit Jamir aser tanga lenirtemi shilem agia liasü. 1995 kum May 2 nu asen lenir Wb. Imtisungit Jamir aser Wb. I. Nungshi Longkumer nati tarutsu lanu asensor asoshi mangdang ngua, bendang semer tapu tanakna watitepa arangshidak shisa riju asutsu nukla nung iba kimong tenla agutsü.

### MLA Keneizhakho Nakhro-i OHCC ki semzüktsü



**Kohima, Rongjui/September 12 (TYO):** NPF MLA Keneizhakho Nakhro-i September 11 nü Officers' Hill Colony Council Office cum multi-purpose building aser community borewell semzüktsüogo.

Sentong nung o jembiba mapang pai, Officers' Hill Colony-i tatishitsü tajung sayua model colony ka ama tanga colony tem anidar, ta ashi. Paisa, colony nung alirtem dang maneni iba amala mapa tajung inyaksü ajungshia liasü.

Ki asüba committee convenor Vikheto Sema-i, iba ki ya 2020 kum August ita ali tasazük 1846 square feet nung asü tenzük aser sen 18,37,000 intoka yangluogo, ta metetdaksü.

Anaben atongtepa tu sür aliba kidang council building den atonga Government Middle

School amenoktsü aser iba den takdang ka youth organization nem agütsüsü aser nisung 70 asem colony council meeting hall ka densema lir. Iba den ano community borewell ka aser lokti metsümeshidak ka dena yangluogo.

Officers' Hill Youth Organisation tir Kezhalezo Solo-ia, community borewell atuba indang metetdakja liasü.

Pai, Kohima nung tajemtsü tzü agi anüngba ajanga colony nung alirtem dang masü saka Kohima nung alir timba ka timtemer, ta ashi.

Lokti nüngdak ajak sorkar dak dang meimaltsüla ta nüburttem tangatetba melenshiba dak ajemdaker tzü agi anüngba tebilemtsü ya tongtibangsa agitsü nüngdakba angateta maparen tenzuka inyak.

Colony nung aliba nüburttemi

lokti meyong ta sayutsü atema community building kima borewell ka amenoktsü atema telemtetba agia liasü, ta pai ashi.

Community borewell March 1, 2020 nü nungi atutsü tenzük aser tia kaa mezüngbuba anogo tzü ngutet, ta Solo-i ashi. Paisa, Sector A, B, C aser D nem tzü kasasa agütsüsü atema community borewell nung outlet pezü inokja lir, ta metetdaksü.

Maneni Solo-i, MLA Keneizhakho Nakhro-i senotsü teyari magütsü asübo iba maparen ta takok ngua minyakteti lila, ta ashi.

Kasa mapang nung T. Khel Kohima Village-i ki yanglutsü atema ali agütsüba aser MLA Keneizhakho Nakhro aser taoba Angh P. B Acharya nungeri anir council office atema tenla tajung agütsüba atema OHCC Chairman, Khrielakuo Sekhose-i kanga pelaba lemsatepa liasü.

### Nübortemi lenirtem dak ...

(TAPAK 1 NUNGI...)

Kasa sentong nung, Dimapur nung Commissioner of Police, Wb.Rothihu Tetseo IPS-ia kaketshirtem ajungshia jembidang, asenok Naga nungertem rongnung shingaipei tashimait mangur saka tangar dang aitsür, iba jagi asenoki asen lima meyanglushitetter. Saka iba amaji mesüi Dimapur ya asen lima, yangi asenok teti alitsü, anungji Dimapur indang tamajung mejembitsüsa, talisa, Dimapur Naga Students' Union leniba kübok kaketshirtemi Dimapur asoshi mapa tajung inyaksüla ta tayongzükba o ka agütsü.

Iba lokti senden metenzükdang, anepdang Nagaland Power department

nung Advisor & MLA Wb.H.Tovihoto Ayemi-i DNSU office first floor semzükja liasü. Iba ki ya meshiteta Dimapur Sumi Baptist Church nung Sannüker Rev.S.Vitoshe Swu-i sarasadem mapang agia liasü.

Iba sentong nung DNSU tir Wb.Sedevilie Angami aser Speaker Wb.Nupato K Chishi nati tepela o jembiba aser lokti osang tongti zülur Wb.B.Mhajan Tsopoe-i agütsü. Kasa sentong nung Dimapur nung telidakpur kaketshirtem rongnung class 10 aser 12 aser Under Graduates purtem rongnung tematiba takok angurtem nem tenüngsang agütsüba mapang liasü.

Tanü iba lokti senden nung

Nüngtet ludeni shima bener aruba ama item lenirtem ya DNSU nung tang nungi 2023 kum tashi mendenpurtem asütsü asoshi tenangzükba agidaksü : President – Wb.Moayanger Jamir, Vice President - Wb. M h a j a n Tsopoe, General Secretary- Wb.Sedelo T Vadeo, Asstt. Gen Secretary – Kr.Chüthuzhüni Chache, Finance Secretary – Wb. David Keneingutuo Sorunuo, Education & Statistic Secretary –Wb.Tesiding Newmai, Social & Culture Secretary-Wb.Khamjailung Kamson, Debate & Symposium Secretary – Wb.Star Khangrah M aser Speaker Wb.Michael Kath.

### NFHRCC-i Sept 12 nü senden ayonger

**Dimapur, Rongjui/September 12 (TYO):** Foothills road ken o dak sendakba nung state sorkari telemtetba agiba metetdaksüba indang sensak asemtsü atema NFHRCC-i September 12 nü 1:00 ako nung senden ka ayongzükogo.

Iba seden nung kin balala HOHO, kaketshir lokti tentet balala, Youth Organisations/ Fronts, CNTC, ENPO, DENSU, ZLSU aser CNSA

nungeria shilem agitsü. Iba senden nung stakeholders tem ajak tejangraba nung arua adentsü mepeshia metetdaksür. Senden ya NFHRCC base Office, Kher Mahal, Dimapur nung amentsü, ta Convenor Supu Jamir, General Secretary W. Lemba Chang aser Asst.Gen. Secretary Chenithung Humtsoe nungeri külem sangdong ka ajanga metetdaksü.

### Security Forces-i ganja bener lia nisung 5 apu



**Dimapur, Rongjui/September 11 (TYO):** Security Forces aser police na longjemer September 7 nü Dimapur District kübok Kukidolong tesem nung ganja bener lia nisung pongu puogo. Nisung pongu rongnung Manipur nung pezü densema liasü.

Osang tejangja angazükba sülen Security Forces aser State police na longjemer iba tesem

meita aoba mapang Manipur kübok Senapati district nung nisung pezü densema nisung pong puogo. Parnok ket nung sen crore 4 alang ganja seret 1000 nguteta liasü.

Ken o maneni bushitsüngdangtsü atema aija alirtem aser parnok ket nungi ngutetba osettem ajak Chumukedima Police Station nem bendanga agütsüogo.

### Chümoukedima Circle Chakhro Public Organisation-i pelaba lemsatep

**Dimapur, Rongjui/September 11 (TYO):** Chümoukedima Circle Chakhro Public Organisation-i sangdong ka ajanga, September 11 anepdang DC Office Complex, Chümoukedima nung nübotoka merekmejuba sentong nung Chakhro Angami Kuda Union aser Angami Mechü Krotho, Chümoukedima Town nungi züngsem noklang aikati shilem tajung agiba atema kanga pelaba metetdaksüogo.

Nüburttemi telanzüba tajung agütsüba ajanga aika ajungmesogo aser iba ajanga District ajanga ajangzüktsü atema District Administration tetsükdaksü makai inyaksangshitsü asoshi teyari agütsütsü mulung aliba sayur, ta kasa sangdong ajanga metetdaksü.

Küm tem tsüngda iba Complex nung inyaksangshi masüba ajanga sakbangatokogo aser merektetsü kanga nüngdaka lir. Anungji nüburttem dang maneni nübotok sentong


ayongzükba iba tesem merektetsü ayongzükter, ta CCCPO-isa metetdaksü.

Ki temeketbo merektetjema odar, ajisiüka ano hall, takdang aser tanga tesemtem merektetsü kanga nüngdak lir, anungji onoki iba temeket nung aliba educational institutions tem dang Administrative staff tem nem merekmejuba nung teyari agütsütsü atema mepeshir, ta kasa sangdong ajanga metetdaksü.

Maneni CCCPO-i, Naga nungter rongnungi yimden yimsüsür tejen aser Chümoukedima jila senso Dr SC Jamir-i, September 1 nü nübutok sentong tenzükja kin tebandang amatoker Naga nungertem kibong ka ama longjemer alitsü ajungshiba atema kanga pelaba lemsatepba den pai arua shilem agiba ajanga iba anogo kanga tongtibang kümdaksü aser kanga ajungmesogo, ta CCCPO-i ashi.

September 11 nü merekmeju sentong nung nisung 300 shi-i shilem agia liasü.

# AICC-i Manipur Congress president shimogo



LOKEN SINGH

**Guwahati, September 11, 2021** (Agencies): Hokolbarnü Congress-i Manipur state unit president inyaksü atema N. Loken Singh shimogo. Congress interim President Sonia Gandhi-i Manipur president inyaksü atema Loken Singh shim. Congress-isa Manipur

atema Working President asem shimogo. Loken Singh ya tang Manipur nung interim state president lir. "Working president asemji-Keisham Meghachandra Singh, Irengbam Hemochandra Singh aser D. Korunghang nung lir" ta party general secretary, Organisation, K.C.

Venugopal-i metetdaksü. Loken, Meghachandra aser Korunghang nung er jak ya tang teinyakdak MLA tem lir. Sonia Gandhi-isa züngsem 33 agi akumba state executive committee ka tentetsüogo. Manipur aser ano state pezü nung sangküm February-March tsüngda Assembly election agitsü sentong lir.

# Tripura: BJP-CPI(M) mepetmesü nung nisung 10 yiru

**Agartala, September 11, 2021** (Agencies): Tripura kübok district balala nung September 8 nü BJP züngsemtemi media house asem aser CPI(M) office asem amakdang nisung 10 tema yirua liasü. Tatalokba balala nung nisung 10 tema yiru aser gari 6 mi agi rongdoktsü. Agartala nung Pratibadi Kalam daily aser parnok indang TV channel PB24, Daily Desher Katha office tem aser Udaipur, Gomati district nung Duranta TV channel office tem amak. West Tripura district kübok Melarmath tesem nung CPI(M) state head office and sub-divisional office aser Bishalgarh nung local party office amak. Hombarnü Tripura kübok

Sepahijala district nung BJP aser CPI(M) züngsemtem mangatettep adokba nung ajemdaker BJP züngsemtemi iba mapa inyak ta osang angazüker. Taoba chief minister aser opposition leader Manik Sarkar-i Hombarnü Dhanpur aser Bashpukur yimtsüngtem semdangdang mepetmesü adoka liasü. Bodbarnü Udaipur, Gomati district, Bishalgarh, Sepahijala district aser West Tripura district kübok Hapania aser Melarmath nunga ozüng alema mapa inyakba osangtem angazükogo. Udaipur nung tensa azüoktsü atema police-i lathicharge aser teargas shells amshitsüsa aküm. Agartala nung gari trok den

motorcycle kar mi agi rongdoktsü. Bishalgarh aser Hapania nung political party tem tem office raksatsü, ta police-i metetdaksü. Udaipur district nung party office ka amak aser idangji Mafiz Miah ta ser lanur ka yiru. Iba dak sendakba nung FIR ka benok aser nisung ana puogo, ta police-isa ashi. Bodbarnü BJP-i Agartala nung rally ka ayonga agidang Pratibadi Kalam, PB 24 aser Daily Desher Katha media house tem amak. Nisung telok ka Pratibadi Kalam aser PB 24 office tem kima nung adenshi aser two-wheeler anena aliba nung mi senoktsü. Parnokisa yimozülur indang gari rongdoktsü, ta osang ajanga ashi.

# Meghalaya nung IED ana ngutet

**Tura, September 11, 2021** (Agencies): Meghalaya nung West Garo Hills Police aser 120 Bn CRPF sepaitemi Mengotchigre nung Improvised Explosive Devices (IEDs) ana ngutet. "Iba mapang Class-II explosives seret 3.25 taret IEDs ana aser detonator 3 ngutet" ta

West Garo Hills superintendent of police-i ashi. 2nd MLP Bn. Goeragre nungi Bomb Detection and Disposal Squad (BDDS)-i IED anaji raksa endok, ta paisa metetdaksü. "Iba dak sendakba nung Tikrikilla police station nung FIR benokogo aser maneni

bushisingdang südar" ta paisa ashi. "Nisung kari danga IED miima ayurtem maitsü meteta lira, onok nem osang sangoktsütsü mepishir. Onok nem osang agütsür maitsü yimjak nung memetetdaksütsü aser senpet agütsütsü" ta West Garo Hills superintendent of police-i ashi.



Arunachal Pradesh sorkari state nungi nüjiso atema rarartem osang tejangja bushitsü atema luden ka tentetogo. Arunachal Pradesh deputy chief minister Chowna Mein menden ser züngsem pungu agi akumba ludeni bushitetba osangji 50 buba Statehood Day nung kaket küma adoktsü. (Itanagar, September 11)

# Majuli rong lendong nung asür ka nguogo

**Jorhat, September 11, 2021** (Agencies): Majuli rong lendong nung taküm samar tasümgang ka Honibarnep angu aser iba nisung ya Indreshwar Bora ta jangjaogo. Bora indang mangji Kaziranga National Park telung nung lia angu. Hokolbarnü pa indang yangkhuji Biswanath Ghat nung nguteta liasü. Indreswar Borah aser pa kinungtsü Ruprekha na Bodbarnü rong nung mena lia lendongji ajuru. Tena ya

Lakhimpur district kübok Rampur nungi lir aser tena Dhekiakhowa Namghar-i aoba sülen meyipa arudang lendong nung densem. Bora ya Rajgarh High School nung school tesayur ka liasü aser pai pa kinungtsü Ruprekha aser tangartem Brahmaputra ayong nung rong nungi kümzük. Indreswar Borah-i kinungtsü den tangar kar kümzükba sülen ano rong nung mena alir kar kümzüktsü atema ao, ta pa kinungtsü ashi.

# Meghalaya CM & NPP president Conrad-i Manipur semdang



**Imphal, September 11, 2021** (Agencies): Meghalaya chief minister aser National People's Party (NPP) national president Conrad Sangma-i Honibarnü Imphal tonga aruogo. Conrad Sangma-i anogo ananü atema Manipur semdang aser iba mapang pai

NPP lenirtem den ajuruteptsü. Conrad-i Manipur NPP lenirtem den 2022 Manipur Assembly election dak sendakba onüktem lemsateptsü imlar. Honibar anüngdang NPP MLA L Jayantakumar-i Imphal Airport nung Conrad Sangma pelaa agizük.

# Assam nung sorkar ketdangsür ana süpokrem agiba atema apu



**Guwahati, September 11, 2021** (Agencies): Assam nung sorkar ketdangsür anati süpokrem meshia agiba atema Directorate of Vigilance and Anti-Corruption-i Hokolbarnü tenaprong puogo. DVAC ketdangsürtemi Kokrajhar nung Superintendent of Excise ka aser Hojai nung school head assistant ka apu. Excise superintendent-i yi ayokba dokan nung manager ka ket nungi Rs 25,000 süpokrem meshia agidang Vigilance team-i pa apu. Pa ket nungi süpokrem sen nguogo aser Anti-Corruption

Bureau Police Station nung FIR ka benokogo. Ano, Hojai district kübok Lanka nunga Vigilance team-i sang ka ayuba nung head assistant ka apu. Lanka High School nung head assistant-i nisung ka indang leave encashment mapa inyaksü atema süpokrem Rs 10,000 meshia agidang pa apu. Pa ket nung süpokrem sen bena aliba ngutetogo aser iba atema Anti-Corruption Bureau Police Station nung FIR ka agütsüogo, ta Vigilance ketdangsür kati ashi.



## TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 12, 2021

### Tenüngsang agütsüba

**K**hristan purtem atema taküm arishi aser nüngdakba rongsen ajak angudak lenmangji Tsüngrem nem tenüngsang agütsüba ya ka lir. Alima nung alir takar aser tulurtema tenüngsang angudang pelar aser peladangbo sensaker aser tilartem nem memeshidangyongi teyari tulu agütsür. Iba amaji asenoki Tsüngrem nem tenüngsang agütsüdang Tsüngrema pelar aser kodang asenoki Tsüngrem peladaktüdir, asenoki memeshidangyongi Pai asenok moatsür. Khristan taküm ka atema jangratemtsüji ibaji asütsü. Asenoki sen teraka angutsü atema anogo piyong belemseta inyaker saka Tsüngrem nungi temoatsü angutsüabajibo melamelar kechiyong asenoki Pa nem tenüngsang dang agütsü nung pai asenok moatsür. Tenüngsang agütsüba mulungjangji Tsüngremi aginer. Tsüngremer temoatsüji anogo shia asenok inyaksangshiba nungi angur. Asenok shisabolua timtema alidang tembar, kiyonger mesüra kinünger kar nungi o tajung ka agi asenok mulung süneptsür, lenmang sayur aser teyari agütsür. Khenkhenbo memetetba lenmang aser memetetba nisung nungi asenok teyari angur. Asenok aneper aser asenok mulung anisüngzüker. Item ajakji Tsüngrem nungi anguba temoatsütem alitsü. Kenü anogo zütsüra aketba nisung teri Yisu ajuru aser parnoki ola adoka Pa dang taneptsü taochi meshi. Idangji Yisui parnok dang parnoksa oa parnok temangji purtirtem dang sayutsü ashi. Anungji, parnoki tashi angaa putirtem dangi aoba mapang, len tom nung parnokji anepadok. Kodang parnok nisung ter rongnung kati pa dak zütsüra adoka aliba to anepogo ta metet, idangji pai Yisu tonga oagi Pa tsüngdang aputaka tenüngsang agütsütsü bilemtet. Paji Samaria nunger ka liasü. Idangji, Yisui pa dang asüngdang, ni nenok ter aneptsü masü no ? Tukubo kong ali ? Iba bendanger nisung ka dak alaka Tsüngrem tenüng asangtsü meyipa arur shinga mali no ? Iba otsü ya asenoki Luke tapu 17 nung shia angur. Yihuda nunger asoshi zütsüra tashidakji tesempatsü aser tashipangtsü tashidak ka liasü. Item zütsüra aketertem to pei yimtak aser pei kidang pei kinüngertem den alitsü mekoki aliba mapang ka parnoki Yisu ajuru aser parnoki meshiba ama parnok nem Yisui taneptsü taochi agütsü. Ajisüaka, Samaria nunger ka dak alaka par tukui parnok anepba asoshi Tsüngrem nem tenüngsang agütsütsü mebiletmet mesüra mapang magütsütet südi. Parnok pei kinüngertem dena melitetsüsa aliba tashidak ka ajungbena ka anep nungji pelakanger parnok tukuprongla to Yisu alidak masü pei yim, pei ki aser pei kinüngertem ajurua matateti aritepa ao südi ta bilemer. Aiben asenok timtem aser nüngdak nung Tsüngrem dang meshia sarasadem. Iba amaji Tsüngremi asenok nem takok agütsür, jala jabaso moatsür, tashidak aneptsür. Alu nung metsü prokdang temoatsü meshia sarasadem proker saka alu rozükerbo Tsüngrem nem tenüngsang agütsütsü amadoker. Tsüngrem dang mapa meshia sarasadem saka mapa ngurbo asenoki Tsüngrem amadoker. Paibo asenok moatsüogo, asenok aneptsüogo aser asenok nem takok agütsüogo saka asenoki Pa nem tenüngsang magütsüteter. Tenüngsang ken 121 nung ashir, kü teyari ajak Tsüngrem nungi arur. Aji oda, kechisarina ajak nung asenoki Tsüngrem nem tenüngsang agütsütsü mamali. Kodang asenoki Tsüngrem nem tenüngsang agütsüdir, idangjiang ano asenok temoatsü tuluba angur. Filipi 4 nung ashir, kecha nunga temulung tadem, saka nenoki tenüngsang agütsüba agi nenoki mepishiba Tsüngrem nem metetdajang. Zütsüra aneptsür tukutobo kong lir ta asüngdangba ama, asenoka kong lir ta Yisui masüngdangtsüsa asenok mulungjang tenüngsang agütsüba agi sünga alitsüabaji kanga tongtibang lir.

## OLEMSABANG

### Tebilemdangtsü:

~ Mrs. Sentikumla. Dimapur.

Tesüiba mapangtem nung Tsüngremi Aortem asoshi tajongshiba agütsübatem koba lemsatepa aruogo item nungi tangatetba yamai aru. Asen lima tamangertem aikati Lai O rateta mangatetba aser tera yanga malibapur jenti lir, aji asünung tasa sentong balala yanglua Lai O nung tera yanga alitsü tesayuba agütsütsüla. Temeneni kanga aritepa mapa inyaksü tenzükogo anungji tamangertem Tsüngrem O memetetra mela mela ashioktsütsü aser aika ashioktsüdagi. Tesüiba mapangtem nung tongmelang tamang agi ali, saka tanü tensa tesayuba balala agi tamangertem nungshir, joko tatepang kati ilonger asünung lai o bushijema aser tanela tangatetba nung akanga melira teshimtetbapura mashileni anisatsü lenmangtem aika dang asen mekuta lir, anungji tamangertem Lai O tarok bushia angatetsü kanga merangtsüla. (sound biblical interpretation) Arogo aser Ministry balala lapoka alirtemi inyakyim tajung aika inyaka alitsü südi saka ano iba den bendenloksema Aor tamang jenjang akanga tanela meremsepi aliba nung yariseptsü asoshi agüja aliba onüktem ya sarasadema shisadanger mapa küma inyaktetra tamangertem lemang aisü nung temoatsü aser tajangzük asütsü ta amanger.

1. Tanela anir aruba mapatem rongnung kakat ken o zülu (literature ministry) agi shilem tulu agir, asen tsüngdong motetba jakatemia yokteter. computer/smartphone ajak ket nung ali masüji media balala nungji ajakibo mereprangtetsü, ano Sayutsüngiba angabajibo aika amadoker, saka kakat lira meyipa repringhiteter. Arogotem webside lapoka alirtemi aser ano takokertemibo lapoka Tsüngrem o zülua lemsatepra tamangertem sen indoka kakat alitsü melena pei sasa download/print süa agitettsü, iba jagi tanela chiyongtsü peria angutsü. Mongdang aser Arogotemi kechi kakat atokdir akokba tashi sen agi mayokba tajungba, aikati sen agibo maliner asünung nungdakbapur metongteter, temulonger Arogo /kija kari sponsor süa inyaksü lemang bushiteptsüla,
  - (a) Bible study guide book: Lai azüngertem ajakibo Tsüngrem o tarokji rateta mangateter, anungji Lai ratet kakat atoka Lai bushiba sendong ternem yanglur Ao Arogotem ajak nung liromedema akatsüla eg:- hapta piyong=kija kibong, wed & sat lokti sentep nung, ano itashia/ita asemshia= meyipa repringshiba, tajongba melenshia agitettsü. Koba kakat/ onük, tama/tesü asütsü ibaji asadanga tensa den apet inyaka aotsüla.
  - (b) Theological dictionary; English-Ao atok nungbo laishibaren danga oshi nung amshibatem angazüktsü nübortem asoshia tanü tensa nung tongtipang asütsü.
  - (c) Teküpoklen agüja aliba onüktem ya tanü asen lima tamanger shiai kanga junga angatetsü nungdak ta repringteter, iba yagi tanela lesson aika angutsü aser asen lima temenen tebenja aika ajema akümttsü ta amanger.
    - (i) Sarasadem & Lumiba :
    - (ii) Tanela Temeshi aser Pa mapatem :
    - (iii) Chichiba Asentenshi :
    - (iv) Tiyazü tesayuba nungi tekümdangtsü :

Sarasadem aser lumiba indang lai tesayuba aikati rajema mangatetba agi takok ngua sarasadem mesüteter, Tanela temeshi aser Pa mapatem jangja-a mangatetba ajanga tebenja aika ajurur, Asentenshi aginer jenti, saka chichiba tanela asentenshi indang junga mangateti aika aibelena aor, Tiyazü tesayuba aser tesayur nungi tekümdangtsü kanga junga sayutsüla, eg, Media balala ajanga Tsüngrem O angadang aser onüktem repringdang kanga kümdangtsüla, mashileni anisatsübatema aika angur. Temetetertem nüngdakba tongtipang websidetem aser menüngdakbatema bushiteta nübor nem tesayuba agütsütsüla.

Arogo shia Sannükeri anir tenzükertem ajaki pei Arogo nung santem asoshi koba onüksa nungdaker iba amaji abensa-a sayudagi ano item onüktemjia aikati tabensaba nung sayua alitsü südi. Saka item onüktem yabo Arogo kar nung dang masü Ao Arogo ajak nung tabensaba nung aser lephsia sayutsüla ta bilemer, anungji mapang agüja inyaktetsüpur kar oda toklang tenzükersa masüyonga retired ministers/theological institutions balala nung inyakerter etc.. yaritepa item onüktem kanga junga rateta kakat küma zülur tamanger kibong shia atatsüsa/ajak mataaka preachers copy danga atoka nübortem nem angatetdaksütsüla. Tsüngremi tajongshiba agütsüba onüktem sarasadema bilemdangdang tamanger ka taküm nung tanela meremsepi alitsüba onüktem den sentaktepa alibatem ta angatet, anungji item onüktem ya külemi zülura "Tanelaji teremsep" ta asüba kakat tenüng amshi nung ajongtsü. Sarasadema bilemdanger nüngdak ta angatetbatem Kija, Arogotem aser Ministry balala lapoka alirtemi tajongba aser terajemba nung mapa küma inyaksü ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## KABA pastor, Bendangsashi Walling-i züluba kaket ka sayaogo



**Kohima, September 11 (TYO):** Kohima Ao Baptist Arogo nung pastor, Bendangsashi Walling-i züluba kaket "Towards Christo-Ethics in Context: Re-Imaging

Nagaland for Christ " September 10, 2021 nü KABA nung senior pastor, Rev. Sentsashi-i sayatsüogo.

Kaket sayaba sentong ya KABA pastor, Dr. S.N. Among leniba nung agia liasü.

Iba kaket züluba nükjidong ya "Nagaland for Christ" ta sangdongba aser Nagaland nung ochimashi jenti aliba na meputepba asadangtsü atema zülu. Süra asen lima nung Khrista tesayubatem benshir asü ? ta asüngdanga shidsadangtsü nüngdak. Anungji "Nagaland for Christ" ta sangdongba aser Nagaland nung ochimashi aliba na tsüngda shisadangtsü atema merangdanga iba kaket ya züluogo, ta kaket zülur, Bendangsashi Walling-i metetdaksü.

## Pakistan nung Muslim nungeri injang agi Khristan pezü yirutsü

**Lahore (Pakistan), September 11 (Agencies):** September 06, 2021 nü Pakistan kübok Lahore yimti nung Muslim nungeritemi Khristantem meyong kidang injang sashia khaloktsüba ajanga mashisa tetsü ka densema Khristan pezü yiruogo.

Lahore nung Sherakot area kübok Shamsabad kiyong nung alir Khristan, Asif Masih-a yirua liasü. Osangbener den jembidang pai, "Nikongdang ni mapa nungi kidangi shilangba sülen ni nisung kar asaba angashi, iba sülen injang ola angashi," ta metetdaksü.

"Ni ozü tanurtem dang ki telungi tuang ta ashiba mapang nung ni tebur telok kati Tenla ki dak injang khaloktsüba angu. Iba sülen parnoki anasa aliba Khristantem kidang injang sashia khaloktsü," ta paisa metetdaksü.

"Prangpong ama alir kati kü tsütsülen ashiba sülen kü dak injang khaloktsüba ajanga kü tepi anaprongla yiru. Ni apudena ozü ki atong aser gate shibang, ajisüaka parnoki maneni kü dak injang khaloktsü. Parnoki iba kiyong nung Khristantem melidaktsütsü aser Tenla ki rongdoktsütsü ta ayimdena liasü," ta Masih-i ashi.

Injang khaloktsürtemji Dilshad Dogar, Butt Gas Wala aser Chand Khencha nunger liasü ta jangjaogo. Parnoki AK-47 prangpong amshia Khristan 300 dak tema aliba kiyong nung Khristantem kidang injang khaloktsü, ta pai ashi.

Parnoki injang khaloktsüba ajanga Khristan

tsür asem- Nirma Bibi, Maria Kashif aser Samina nungera yiruogo, ta pai ashi.

"Par asem rongnung kabo ita trokbuba mashisa lir. La injang agi tetsüng yiru, saka lar kinüngertemi la kümzüka ki telungi anir ai," ta pai ashi.

Nikongdang 2:30 ako meta parnoki injang khaloktsüba mapang nung nisung aikati police emergency helpline dangi phone süa liasü saka aonung 8:00 ako nung ang police iba tesemji tonga aru. Muslim nunger asemji tashi tulu aliba nisungtem asüba ajanga police-i aibelenertem anema kecha meinyak.

Masih densema Khristantemi Muslim nunger anema ken o benokogo.

"Police-i FIR nungji kiralongra dak sendaka Arrlabo magizük. Ni FIR nungji parnoki maneni Tenla ki rongdoktsütsü aser Khristantem anema inyaksü ta amokmerenba kuli agüja lir, ajisüaka FIR nungji police-i ibajibo magizük," ta paisa metetdaksü.

Police-i ashiba agi, Khristan Asghar Masih aser Dogar na tsüngda mangatettep adokba nungi Khristantem anema inyak.

Asif Masih-i, "Parnoki nija ka den mangatettep adok süra kechiba Dogar aser par medemertemi tai maket Khristantem kidang injang khaloktsü? ta parnok dang asüngdangtsüla. Mezüng anogo nungi police-i aibelenertem kümzüksü meranger, kechiyong parnok Muslim nunger lir saka onokbo sensaker Khristantem lir," ta ashi.

Pakistan nung Christian

Lawyers Association nungi Attorney Javed Gill-i, injang khaloktsüba dak sendakba nung osangtemji khenyongi balala, ta ashi.

Osangbener den jembidang Gill-i, "Iba kiyong nungji alir aikati, kiyong nung Tenla ki ka alibaji Muslim nungeri maginer aser Khristantem dang iba Tenla kidangji tekülem sentong magitsüla ta shia amokmerenba kuli süogo. Ano karibo iba mangatettepji tetsür ka mechi nungi adok ta ashir," ta metetdaksü.

"Nisung ana tsüngda mangatettep ka dang asü nungbo kechiba prangpong amshia kiyong nung Khristantem ajak anema inyak?" ta pai asüngdang.

Ozüng alema prangpong balala amshia injang noklang aika khaloktsü aser Khristan aika yirutsü, ajisüaka police-i FIR nungji Anti-Terrorism Act kübok Arrla 7 bo benoktsü memelung. Iba aibelen ya bail-a mangutsüsa aibelen ka lir. Tai maket nisungtem dak injang khalokja kiojen raksatsüba mapang nung police aja saka parnok mapang shidak nung maru; iba atemaji police-i kuli kecha magütsüteter," ta Gill-isa metetdaksü.

"Ajisüaka iba tatalokba nung nisung shinga masüba atema Tsüngrem dang pelar, saka aibelenertem jagi kari danga parnok nokdangtsü merangra kecha marendaki nisung khaseter lila," ta paisa shisem.

Alima nung Khristantem tamajungtiba reshikangshiba linük 50 rongnung Pakistan ya jenjang 5buba nung lir (Open Doors 2021 World Watch list).

## ANO GO ABEN TSÜNGREM DEN

### TASHI ITSHIANG

**"...saka Dawidi pa Tsüngrem Kibuba nung pa sasa tashi itshi." I Sam. 30:6c**

Israel chuba Dawid taküm nung Kibuba Tsüngrem den tesendaktep takang yutetbaji pai Kibuba dak temulung lemteta tamang katetba ajanga liasü.

Khen mapang ka Dawid aser pa temerangertem tsükchir amaki or alidang parnok tsükchir Amalek nungeritemi pa alidak Ziglak maka yimtiji mi agi rongtoktsür külen tebutsü anati anir (Ahinoam/ Abigail) tetsürtem, tila-tulu aser jala-jabasotem parnok akabatem ajak kata metepseti pua bener or liasü.

Kodang Dawid aser temerangertem Ziglaki meyipa aru parnoki item tatalokbatemji angudang parnok rongnung mang yima tejashi tulu nung ajep, aser temerangertemi Dawid dak long agi onsetsü anema noktak, idangji pai Kibuba Tsüngrem nung pa sasa tashi itshia Kibuba nungi temelaba agir tsükchir Amalek nungerji aria oa parnok ket nungi tanaben pur aoba ajak meyipa anir aru.

Khristan taküm ka nung tamang tongpang rara mapang aiben ajurur, iba mapang nung kodang timtem aser tamakok ajurudir asen tashi aser tangatetba kija nung temulung lema meli-i Tsüngrem tekümzüka tashi nung tashi itshia alitsü nungdaker.

### SARASADEM

Oh! Tsüngrem, ni kü sasa dak temulung lemtetba shisatsü benschia aliba tatok nangzüker, kü dang taochi sayuangma. Amen

## China nung Christian Music Schoolka mita ao aser Principal apu

**September 11, 2021:** September 4 anepdang China nung Heilongjiang province kübok Harbin nung sorkar ketdangsertemi Christian music high school ka mita aoba sülen asüngdangyatsü atema tesayur aser students aika apu, iba dak alia music school nung principal apu, ta International Christian Concern (ICC)-i metetdaksü.

China Aid osang ajanga ashiba agi, SWAT officers, police officers, religious affairs bureau officials aser local school district administrators densema Chinese Communist Party (CCP) ketdangser 30-i anepdang 8:30 ako nung Khristan music school ji mita ao.

Music school nung students aser tesayur 100 shi dang ghonda 24 shi asüngdangyaba sülen ang chioka liasü. China ketdangsertemisa Music school nung aliba pianos, computers aser documents densema oset aika puogo, ta kasa osang ajanga metetdaksü.

Anogo ka jakdang Khristan music school nung Principal, Xu-i tesayurtem dang, police ketdangsertemi ali kibur dangi phone süa ken o jembitsü atema renema liang ta shiogo, ta metetdakja liasü.

Asüngdangyaba sülen

students aser tesayur timbaka chiokogo saka tesayur karbo tang tashi mechiok. Khristan music school nungji arrshi küm 18 tekübokpurtem dang lir, anungji Principal Xu-i tanurtem Khristan yimsü dangi meyipdaksütsü atema mesüzüker, ta pa nem tai tongloksütsü akok.

Principal Xu apuba sülen tang tashi pa indang osang kecha memeter.

Osangbener den jembidang Principal Xu'er medemer, Jin-i, "Tang Arogo kar nung Khristantemi parnok atema lawyer ka bushitsütsü meranger. Student shia dang fee RMB sen 17,000 meshir, anungji ozüng alema shisaliok agütsüba atema sorkari Xu anema inyaksü akok," ta metetdaksü.

Paisa, "Ita trok tejaklen sorkar ketdangsertemi Principal Xu'er ki anaben tashi mita reprangogo. Pa indang phone ajanga pa anema itangiter. Onoki pa kong aliar jangjatsü meranger, ajisüaka tang tashi osang kecha mali," ta metetdaksü.

China Communist Party-i Khristan school tem anema inyaker. Iba dak alia sorkari tanga Arogotem tsübudaksütsü atema Early Rain Covenant Arogo anemabo kanga inyaker.

**OLONG PAITEP # 5934**

1			2			3			4	
			5		6		7			
8										
			9							
	10									
								11	12	
			13				14			
15						16				

<b>TIPILEN</b>		<b>LANGTSÜNGLEN</b>	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang tongtonglatsü atu	- (5)	10. Tetsung tajemetdak	- (6)
15. Tejen lai nung tesayur	- (5)	12. ___ adenshi	- (4)
16. Tsüngsak-mopung	- (5)	14. Tsünusenbongtsü adokdak	- (3)

**OLONG PAITEP # 5933 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Kasa, 6. Rangben, 7. Mait,		1. Khu, 2. Sùjak, 3. Onük, 4. Oba,	
9. Poktet, 11. Ati, 13. Atasa, 16. Rür,		5. Anü, 6. Ratet, 7. Mozü, 8. Ita,	
17. Rajang, 20. Lanu, 24. Nüngjem,		10. Tar, 12. Tinu, 14. Salem, 15. Aja,	
25. Süra.		18. Anünü, 19. Tajü, 21. Ano, 22. Onü,	
		23. Kua.	

**KOMA SÜLA TELANGZÜBA**

Q. Nagaland angh R.N. Ravi ya melen nunga koma süla ?

State mesüra Union Territory temi Governor tem yokbaji Center nung koba party yimsüsüba bangdak amma ali, parnok den jungtepa alir mesüra iba party background nung alir angsa yoker (rubber stamp). Anungji Nagaland Governor R.N.Ravi ya melen nunga Modiba bo Modiba molungba dang asütsü.

-WhatsApp

Hai! Asen Naga nungertem, Nagaland angh R.N.Ravi melena mekazüyonga Na aser Ni tejen yimya tamasa endoker ajemalua pei sasa libaliro aser shisatsü melenshidi. Ajiang alima asoshi tejakleni aotsü.

-W. Jamir, Kohima

Nagaland nung shibai ochi jempidir pa/la sempar. Angh-i Naga nunger aser underground otsü shidak jembira kechiba Angh melentsü? Yisui-a Naga nunger ya Auer/nükmerem lir ta tamajung ashi nungbo sempatsü südi.

-M.A,Ao, 4th mile Diphupar.

President of India-i asenok koma süla ta asüba ya züngshi südi RN Ravi to melenogo. Tanga onük ka yokang.

-SMS

Nagaland nung tang aliba Angh RN Ravi ama tajung, nübor meimba aser mapa tajung inyaksüba angh Nagaland-i maru. Pa melen nung kangasa majungtsü.

-SMS

Nagaland Angh R.N Ravi ya state kümer Angh arur rongnung kanga agi asen minor meimba aser yimden yimsüsürtem, state nung mapa inyaker, ochimashi aser nübor asoshi mapa meinyakba yimjak nung tuteta ashiba. Ano auyar külakponger azüoka inyakba Anghji pa ama Nagaland nung mangu. Pa ama ka melen nungbo tamajungba asütsü.

-SMS

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Küm**  
 (n) ita terana agi akümba mapang (year)  
 \* **Küm** ka nung ita terana lir.

**Kümba**  
 (n) meti, metilong (cotton)  
 \* **Kümba** agi ang kümer sü ataker.

**NAI-A YA METETTER MA?**

- SEPTEMBER 12 NÜ ASOR TONGTIBANG NISUNG KAR:**
- British explorer Henry Hudson (1575)
  - Gatling gun inventor Richard Gatling ( 1818)
  - French Nobel chemistry prize laureate Irene Joliot-Curie (1897)
  - Indian politician and journalist Feroze Gandhi (1912)
  - American country music singer George Jones (1931)
  - Actor Linda Gray (1940)
  - Singer Maria Muldaur (1943)
  - Author Michael Ondaatje (1943)
  - Singer Barry White (1944)
  - Actor Rachel Ward (1957)
  - Composer Hans Zimmer (1957)
  - Musician Ben Folds (1966)
  - Comedian Louis C.K. (1967)
  - Actor Paul Walker (1973)
  - Rapper 2 Chainz (Tauheed Epps) (1977)

**TANÜBO NAI LANGZÜANG**

Q. Asia nung linük koba ajanga "Plastic Pact" mezüng tenzük?  
 A. India                      B. Russia                      C.China                      D.Japan

\_\_\_\_\_ (Taruba adok nung onoki langzüsü)

**YASHI ADOK TELANGZÜBA : 2014**

**SUDOKU # 5975                      TELANGZUBA # 5974**

			8	7				4	7	8	1	2	9	3	5	6		
	1		4			9	7	3		9	5	6	8	7	3	1	2	4
				3		5	8			3	1	2	4	5	6	8	9	7
		2								1	4	3	6	9	8	2	7	5
			5		6	1	4			7	2	9	3	1	5	6	4	8
6	4	7		1	8	3				6	8	5	7	4	2	9	3	1
	6	8	1	5		2		7		5	3	1	2	6	4	7	8	9
	9		3			8				8	9	7	5	3	1	4	6	2
			7			4		6		2	6	4	9	8	7	5	1	3

**OJANG LUTEP # 5520**

- NGKAA :
- NGJUA :
- AKINYA :
- URAR :
- LESÜN :
- RATAK :
- AKTILA :
- ANAJGA :
- PAMA :
- KSARADOK :

**OJANG LUTEP TELANGZÜBA # 5519**

**KAKETSHIR AIKATI MERANGA AZÜNGER AJISÜKA KARI DANG TEMABA JENJANG TONGTETTER**

**TAN HOPTA ATEMA - KOMA SÜLA ?**

Q. Jammu& Kashmir amato Nagaland state agi Union Territory-ang ana kümtsü nunga koma süla ?

# India aser Australia nati 'two-plus-two' senden tenzükogo Gujarat CM, Vijay Rupani-i menden toktsü



New Delhi, September 11, 2021: Honibarnü India aser Australia na tsüngda 'two-plus-two' senden nung Australia Defence Minister, Peter Dutton aser Foreign Minister, Marise Payne na den Defence Minister Rajnath Singh aser External Affairs Minister, S Jaishankar nungert tangokba noksa nung angur.

**New Delhi, Rongjui/ September 10 (Agencies):** Honibarnü India aser Australia na tsüngda 'two-plus-two' senden tenzükoba India Defence Minister Rajnath Singh aser External Affairs Minister, S Jaishankar nati Australia Defence Minister, Peter Dutton aser Foreign Minister, Marise Payne na den senden menogo. Foreign & defence ministerial senden amenba nukjidong ya Indo-Pacific region nung China-i ambangyima inyakba mapang nung India aser Australia nati defence aser asalentong balala nung amalitepa inyaktsü nukjidong nung amen. Tang alima linüktemi Afghanistan tensa dak ranglokba mapang nung linük anati iba senden amener, aser kasa senden nung Afghanistan

onük-a süoka jembio. Hokolbarnüa Rajnath Singh-i Australia defence minister Dutton den onük aika nung o lemtepa liasü aser Jaishankar-ia Australia Foreign minister Payne ajurua liasü. Senden nung defence minister anati Afghanistan nung tensa mejungu aliba indang jembiba den külemi Taliban-i yimsüsüba Afghanistan nungi kiralongra proktsüa akok, ta tebilemtsü onük balala lemsatepogo, ta ketdangsertemi metetdaksü. Quad züngsem linüktemi Indo-Pacific region nung amalitepa inyaktsü atema jembiba mapang nung Foreign & defence ministerial senden amener. Quad züngsem linüktemji India, Australia, US aser Japan linüktemi lir. Hokolbarnü Observer

Research Organisation-i ayongzükba sentong nung jembidang Payne-i, Quad ya kanga kera tentet aser mapa takok ngua inyakdar aser India-i region nung lenisüba shilem tajung agidar, ta metetdakja liasü. Indo-Pacific region nung tayongzükba balala atema jembidang Australia foreign minister-i, linük tulu aser tilatem temeden ajak akhümtsübuba aser linük kati danga ambangyima meinyakba region ka Australia-i bushir, ta ashi. India aser Australia na tsüngda lenla aika nung amalitepa inyaktsü nukjidong nung foreign aser defence ministers senden ya ayongzükba amener. Yaküm June ita nungi tenzükoba India aser Australia na tesendaktep tajungba kumogo.

**New Delhi, Rongjui/ September 11 (Agencies):** Sangküm December ita nung Gujarat assembly election agitsü lia Honibarnü state chief minister, Vijay Rupani-i state Angh nem CM menden nungi anenba shidi agütsüogo. 2017 küm December ita nung Rupani-i Chief Minister inyaktsü atema tenanzükba agia liasü aser pa ano küm ka shi CM inyaktsü anünga lia pai CM menden toktsür. Rupani-i CM menden nungi anenba sülen pai aniba cabinet-a ajaki anen. Angh, Acharya Devvrat ajurua menden nungi anenba shidi agütsüba sülen osangbenertem den jembidang Rupani-i, "Ni Gujarat chief minister menden toktsüogo," ta metetdaksü. Ajisüaka pai kechibai CM menden toktsüar kuli mejangja. "Küm 5 state tenzüktsü atema kü dang melaa liasü. State terenlok atema ni inyakogo. Ozü party-i kechi shidir ni inyaktsü," ta paisa shisem.

Tawa BJP nungi Chief Minister tem- BS Yediyurappa, Tirath Singh Rawat aser Trivendra Rawat nungeria CM menden nungi anena liasü aser tang Rupani-ia CM menden toktsür. Rupani den state BJP in-charge Bhupendra Yadav, Union ministers Purshottam Rupala aser Mansukh Mandaviya na, state cabinets- deputy CM Nitin Patel, Bhupndrasinh Chudasama aser Pradeepsinh Jadeja nungeria Angh ajurua menden nungi anenba shidi agütsüogo. Pa melen shiba chief minister inyaktsü?, ta asüngdangba langzüdang Rupani-i, ibajibo party-i dang telemteba agitsü, ta metetdaksü. Na Gujarat BJP Tir, C R Patil den mangatettep adok asü?, ta asüngdangba langzüdang pai, masü, ta langzü. Rupani ya Jain kin nungi lir aser state nung Jain nütsüng shilem 2 dang lir, anungji pa melen CM menden atema Patidar kin nungi BJP lenir ka shimtsüa akok, ta bilemer.



September 11, 2021 nü Uttar Pradesh kubok Prayagraj nung linük Tir, Ram Nath Kovind-i Uttar Pradesh National Law University & Advocates Chambers asütsü atema foundation lung azüngtsüba sentong nung pa den Uttar Pradesh Anandiben Patel aser Chief Minister Yogi Adityanath nungert adenba noksa nung angur.

# India nung ano nisung 33,376 dak Covid putet aser 308 asü

**New Delhi, September 11 (Agencies):** India nung ano nisung 33,376 dak coronavirus putetogo aser tang tashi nung linük nung nisung ajak senteper 3,32,08,330 dak iba tashidak putetogo, ta Honibarnü Union Health Ministry-i metetdaksü. Tesüiba ghonda 24 tsüngda linük nung coronavirus tashidak agi shiranger 308 süogo, ta Honibarnep Health Ministry-i metetdaksü.

Tang India nung coronavirus tashidak agi teshirangdakpur 3,91,516 kumogo aser ibaji coronavirus caseload nungi shilem 1.18 lir. Tang hopta shia coronavirus positive putetba shilemji 2.26 lir aser anogo shia positive putetba shilem 2.10 lir, ta Health Ministry-isa metetdaksü. Tang tashi nung India nung samples crore 54.01 tendangogo aser iba nungji Hokolbarnü

samples 15,92,135 tendangba densema lir. Taküm January 16 nü India nung coronavirus vaccination tenzükba sülen tanü tashi nung vaccine dose crore 73 dak tema tutsüogo. Tang tashi nung India sorkari states aser UTs nem coronavirus vaccine dose crore 72 dak tema angati agütsüogo, ta Union health ministry & family welfare (MoHFW)-isa metetdaksü.



September 11, 2021 nü Poonch district kubok LoC anasa Dhari yimdak coronavirus vaccine agütsütsü atema sepaitemi medical team ka mina aoba noksa nung angur.

# Election agitsü aliba UP nung aluyimertemi longkak sashia aittsü

**Lucknow, September 10 (Agencies):** Sangküm assembly election agitsü aliba state- Uttar Pradesh nung aluyimer organizations 85-i Sanyukt Kisan Morcha (SKM) kubok longjemer Lucknow nung adenshia anogo ananü tashi senden mena aluyimba ozüng tasen asem anema maneni longkak aittsü atema o lemtepa liasü. Iba senden nung SKM UP tenteta liasü aser iba telok jagi aluyimertem dang masü saka Dalit nunger, tetsürtem, aayangertem aser tesayurtem densema tanga unions aser organizations aika ayongdentsü aser September 17 nü state nung longkak aitba sülen September 27 nüa linük tesem ajunga mokdanga aluyimertemi longkak aittsü. SKM UP-isa BJP lenirtem, BJP den teloktep party tem aser corporates sendoka parnok dang wako tanak sayutsü lemtetogo. "SKM ya tendanga tenzükba tentet ka lir aser iba ya UP nung mezüng tenzük. Onoki ki, jila aser yimtsüng ajak sema aluyimba ozüng tasen asem

agentsü atema akhangba, mochitzü lu ayimertem anema inyakba, light bill timba akümba, kibur mali shiruru nemzüba, toll plazas lapokba aser minimum support price (MSP) akhangba indang angatetdaksütsü," ta SKM lenir, Darshan Pal-i metetdaksü. 'Mission Uttar Pradesh & Uttarakhand' dak sendakba nung aluyimer lenirtemi, onoki Uttar Pradesh nung assembly election agitsü jakdang lokti senden aser mahapanchayats aika ayongzükba agitsü, ta metetdaksüogo. "Nüburtem tsüngda telemsa adokdaksütsü atema BJP-i tamangba yimsü aser kin amshir, ajisüaka aluyimertem tebilemtsü onük atema onok ajak longjema lir. Onoki UP nungbo telemsa madokdaksütsü," ta aluyimertem lenir, Ashok Dhawale-i metetdaksü. "Mission UP ya state aser Centre naprongla nung BJP sorkar anema lir. Onoki party shinga pu masemer saka December ita nung BJP anema yimyim ka shimtsü," ta paisa shisem.

## Taliban-i takok anguba ajanga tang telok ajungmesotsü: UN Chief



Antonio Guterres (File photo)

**New York, Rongjui/September 11 (Agencies):** Afghanistan nung Taliban-i takok anguba ajanga linük balala nung tanga teloktem tasü taitba kümdaktsü akok, ta Secretary-General Antonio Guterres-i tekümdangtsü metetdaksüogo.

Alima nung kiralongrar dak sendakba nung shisabulua bilemba indang lemsatepba mapang pai, telungpurtem den sensaksemtsü kanga tongtibang, kechiyong UN-i international relations nung iba linük nem shilem tajung agidaktsüner ta ashi. Taliban puri August ita tom len sorkar atsüngtoka Afghanistan amokbangogo.

"Linük balala nung tatalokbatem ngua ni kanga shisabulur. Afghanistan nung Taliban-i takok anguba ajanga tanga linüktem nunga telok balala ajungmesotsü akok," ta Guterres-i UN Headquarters nung osangbenertem den sensaksemba mapang ashi. "Asenoki telok aikati Taliban nem tenüngsang agütsüba dang masü saka parnoka tali tashi taitba akümba ngua arudar," ta pai ashi.

Paisa, tang Sahel amala tesem atema kanga shisabulua bilemer, kong kiralongrartem azüoktsü atema security

mechanism tapet mali aser tang tensa dak ajemdaker kiralongrartem tasü taitba küma tejakdangi odar aser kasaji tanga tesem nunga atalokdar, ta ashi. Sahel ya Africa nung Sahara aser Sudanian savanna na tsüngda lir.

Tia tensa ajak nung pei taküm bendanga agütsütsü renema aliba mesera tasüba ya maparen tajung ka ama bilemba lokti ka kodang lidir, aser iba amala telok yagi linük ka amaktsü telemtetba agira army temi parnok menokdangteti jenshiba asenoki ngua arudar, ta Guterres-i ashiba den, Afghan Army anogo tenet tsüngda samaoadok, ta ashi. "Ni kiralongrartem inyakyim ngua kanga shisabulur. Linük aika iba den raratsü renema maliba ngua shisabulur. Kiralongraba inyakyim den raratsü atema linüktem tali longjemtsü nüngdaker," ta pai ashi.

United Nations humanitarian tekolakba Martin Griffiths-i Kabul-i oa Taliban lenirtem den ajurutepa sensaksemba mapang Guterres-i ashiba agi, onok Taliban den sendaktepa arudar aser tang Taliban den sensaksemtsüji kanga tongtibang ta bilemer. Taliban-i züngsem 33 agi kümtetba Cabinet ka sangdongogo, kong

tetsür ka danga mali aser UN-i kiralongrar ta jatsür alirtema densema lir. Guterres-isa, onoki Afghanistan sorkar ya Afghan nung lokti balala nungi züngsemtem anioka tentetba sorkar ka sūdaksüner, ta ashi

Paisa, Afghanistan ya Kiralongrartem jenokdak tesem ka mekümdaktsütsüla, ta ashi. Onoki basic human rights agütsüdkatsüner aser ni talisa tetsürtem temeden atema shisabulua bilemer. Onoki Afghanistan nem international relations nung shilem tajung agidaktsüner, ta pai ashi.

Guterres-i osangbenertem dang ashiba agi, tebandang kecha makai tesem balala nung teyari agütsütsü aser tetsürtem dak sendakba nung tebilemstütem asadangtsü atema Taliban den tesendaktep ayutsüji onok mapa ama bilemer.

UN tekolakbaisa, Taliban den sendaktepa alitsü aser kasa mapang nung onok tebilembatem ashitsüji kanga tongtibang ta amanger, aser iba den Afghan nungertem bendanga agüja nongitba sayutsüji tongtibang, ta ashi.

Taruba hopta yanglushitsü aliba Afghanistan nung United Nations Assistance Mission indang asüngdangba mapang Guterres-i ashiba agi, tensa mejangjai aliba mapang ka nung UNAMA atema tetuyuba tasen ka agütsütsüji tamakoktsü ta bilemer.

Iba ya mapang tatsüka atema benoka atatsü imlar aser iba mapang nung Afghanistan nung tensa asadanger UN-i kechi koma shilem agitsüla aji lemtetsü, ta Guterres-i ashi.

Paisa, tarutsü atema ken o tejangja ka nüngdaker aser UNAMA tetuyuba asadangshia tang aliba dangi nungi balaka benoktsü nüngdaker, ta ashi.

UNAMA benokshitsü atema telemtetba ya Member States temi agitsü aser Guterres-i, UNAMA atema tetuyuba tasen ka kanga junga renemer benoktsü atema mapang tatsüka atema benoka atatsü imlaba lemsatepa liasü.

## Russia den rara adoktsü akok: Ukraine tir

**Kyiv, Rongjui/September 11 (Agencies):** Ukraine tir Volodymyr Zelenskiy-i Hokolbarnü ashiba agi, Russia den rara adoktsü akok, saka ibaji nokdangtsü atema pai tamasa Russia tir Vladimir Putin den sensaksemner, ta ashi.

Yalta European Strategy (YES) summit nung Russia den rara adoktsü akok asü ta asüngdangba mapang Zelenskiy-i, "tatalokba ajak rongnung aji tamajungtiba asütsü saka tia maka rara adoktsü akok," ta langzü.

Russia aser Ukraine na tsüngda mangatetep ya taoba mapang "undeclared war" ta tetshia aruogo. Iba rara ya küm

tenetbuba rara arudar aser iba rara nung nisung meyirejang aika taküm samaogo. Russia-i 2014 küm Ukraine ket nungi Crimean Peninsula rakzüka sülen iba rara tenzü, koba anüolen aliba linüktem aikati magizüki lir. Iba sülen mangatetep ya Ukraine anüdoklena tenzü, kong Donbas tesem nung Moscow-i pro-Russian separatists tem nem teyari agütsü. Kyiv-i ashiba agi, anüdoklen mangatetep adoker aliba nung 2014 küm nungi tang tashi nung nisung 14,000 süogo.

"Mapang talangka nungi Ukraine renemer lir," ta Zelenskiy-i ashiba den, Nato

military alliance nung adentsü atema par linüki mepeshiba ano osang tejangja magizüki lir ta ashi. Iba jengang agiba ajanga Moscow kanga mepeladaktsütsü.

"Rara ya Russia asoshi aibelen tulutiba asütsü. Tensa mejangja saka rara adoktsü akok. Lendong ya shilang marutettsüsa jengang ka tongogo," ta Ukraine tir-i ashi.

Reuters sangdong ka ajanga ashiba agi, Ukraine-i yimjung asoshi sensaksemtsü atema tejangraba malaiba Russia-i aija arudar aser kasa mapang nung mangatetep adoker aliba tesem nung Putin den senden ka amentsü atema Zelenskiy-i amajok nung nongshia arudar.

## MULUNGNEN O



Sept 5<sup>th</sup> 2021 anogo nung onoki kanga dang meima aliba asür tsürabur Lt. L. Ngangshikaba Tsüdir Yimchenkimong akümüli wadang tempanger teti alitsü limai ogo. Pa shiranga alidang nungi asü pila mapang tashi nung kinunger, adianutem, kiyonger, yimtsür yimertem, tembartem, kija kibong aser lokti balala shirnokisa ozü asüko mapang nung nübu rongsen aser sarasadem den maparen balala nung yaritepogo nenok ajak dang kangasa pelaba lemsateper.

Nenok mapa tajung atema ozüi kecha meyipa agütsütsü mali saka asen teyanglur takar Tsüngremi nenok ajak mojangma.

~ Temeim Kinungtsü, Jala Jabaso, Semchir aser Kinunger adianutem.

OFFICE OF THE  
LANGPANGKONG SENSO TELONGJEM  
Kohima- 797001, Nagaland

**LSTK Ajanga Tenüngsang Agütsür**

- Wb. IMOKABA JAMIR** (IRS 1998 Batch) (Changtongya) Commissioner & Secretary Planning & Co-ordination, Government of Nagaland, asen lima nung arua inyaktsü arutetba asoshi pa nem tenüngsang aser tetushi agütsür.
- Wb. TEMJEN LONGKUMER** (Merangkong) Co-operation Department Nagaland Kohima nung Registrar (HOD) jenjang tongtetba asoshi pa nem LSKT ajanga tenüngsang aser tetushi agütsür.

Tsüngremi asen lenir tem taküm aser kibong alima aser nüpur lenitsü asoshi anema aliba den arüshi talang mojangma.

Sd/- (Wb. A. Pangjung Jamir) President, LSTK  
Sd/- (Wb. Lepzung Pongener) General Secretary, LSTK

## Kidanger linüktemi Taliban dang Daesh, AlQaeda nokdangtsü mepeshi

**Kabul, Rongjui/September 11 (Agencies):** China, Iran, Tajikistan, Turkmenistan, Uzbekistan aser Pakistan ta kidanger linük troki külem sangdong ka ajanga Taliban dang telok ajak züngoksema aliba sorkar ka tentetsü aser Daesh aser Al Qaida nung Afghanistan nung renloka modaktsüi nokdangtsü mepeshia metetdaksüogo, ta Tolo News sangdong ka ajanga metetdaksü.

Pakistan-i achaayanga Afghanistan dak sendakba nung minister jengang nung virtual senden ka amenba sülen anogo ka lir Bresthostibarnü iba osang sangdonga liasü.

Parnokisa, Taliban dang ajak dak apet policy tem benoktsü mepeshia den internal aser external policy tapet benoka inyakba inclusive governmental structure ka tentetsü; Afghanistan kidangertem den apet policy benoktsü; yimji-yimjung, security, tekümüzkba;

aser ethnic teloktem, tetsür aser tanurtem densema fundamental human rights akhümtsübuttsü nüngdakba indang lemsatep.

Kasa sangdong ajanga parnoki Taliban dang Afghanistan litsü nung kiralongrartem inyaksangshi mesüdkatsütsü atema mepeshia liasü. Parnokisa linük nung opium yangluba nokdangtsü metetdaksü, ta Tolo News ajanga metetdaksü.

"ISIS, Al Qaeda, ETIM, TTP, BLA, Jondollah amala kiralongrar teloktem Afghanistan litsü nung renloka modaktsütsüla," ta parnoki ashi.

Kidanger linüktemi Afghanistan indang sovereignty akhümtsübuttsü aser parnok telung ken o nung mejushitsü ta ashiba den Afghanistan tarutsüji UN Charter dak ajemdaker Afghanistan nungertemi yanglutsüla aser yimjung asoshi nüburtemi tongpo apur inyaktsüla, ta ashi.

OFFICE OF THE  
CHUMUKEDIMA AO BAPTIST AROGO  
SANGDONG

**TOKLANG TENZÜKER SHIMTSÜ SANGDONG**

Chumukedima Ao Baptist Arogo nung Toklang Tenzükba mapa tazüing adokba (post vacancies) yamai sangtonger:

**Associate Pastor (Youth Ministry) – Post ka (one) aserArogo  
Secretary – Post ka (one).**

Iba mapa ana atema tetoktepa/tendangba agitsü anungji temulunger aser temsüa alirtemi (Ao kin) 18th September 2021 tashi nung agüja aliba address den telephone agi tontepatep süang. Shrinoki telephone südir parnok nem Whatsapp mesüra email ajanga application format aser tanga kuli nungdakbatem tejangja agütsüsü.

**Address:**

**Dr. Moa Walling Convener,  
Search Committee**

**# 985608366 / 7005287704**

Mail id: **drmoawalling@gmail.com**

**Pastor  
CABA**

**Longleng nung Smoke Free District Headquarter Campaign tenzükogo**

**Longleng, Rongjui/September 11, 2021 (TYO):** Bodhbarnü (08.09.2021), DC conference hall, Longleng nung "Smoke Free District Headquarter Campaign" tenzükba sentong den külemi District Level Coordinator Committee (DLCC) Longleng aser District Tobacco Control Cell (DTCC) Longleng senden agia liasü, ta sangdong ajanga metetdaksü.

DC & Chairman (NTCP) M. Shayung Phom-i, DLCC & DTCC indang committee tasen telok dang metetpeladaksü aser "Smoke Free District Headquarter Campaign Longleng" tenzükja liasü.

Iba sentong nung, DC-i committee tasen dang pei nem nungloksüba maparen tasüita aser takok ngua inyaksü

ajungshiogo. Nüburtem kümdangshidaksütsü atema, iba committee tentetba indang osang sangoktsüsüla ta telok ayongzük.

Medical Superintendent, District Hospital, Longleng Dr. Kibangkumba-i, temesepba chiyongsü tem achi-ajemba ajanga temang nung timtem talisa TB, Cancer adokdaksüba, temolungjang agi mapa meinyaki akümba indang nung jembi.

Temesepba chiyongsü amshiba ajanga temang nung timtem balala agütsüba indang lanurtem tsüingda meteta lidaksütsü asoshi, district kübok school aser college nung akok tashi awareness campaign ayongzüksüla, ta pai ashi.

DLCC & DTCC Longleng

indang tongmelang agi ashiba mapang, District Nodal official (NTCP), Longleng, Dr. Bongau Phom-i, khuret abenba senso tajung ka ama alitsü asoshi telok ayongzük, kechiyong lokti kazüba tesem ka nung pei achi-ajem mazuokba ajanga külem nübur timtemdaksü, ta pai ashi.

Dr. Bongau-i, section 4 COPTA Act 2003 "lokti kazüba tesem nung moko machitsü" aser office, mapa inyakba tesem aser kidang moko machirtem aser tanurtem anasa moko achirtem inyakyim nokdangtsü asoshi mapatong akangshidaksütsü nükjidong nung iba campaign tenzük, ta ashi.

Iba sentong nung, Dr. Bongau Phom, District Nodal official NTCP Longleng menden liasü.

**Phek nung cooking competition ayongzük**

**Phek, Rongjui/September 11, 2021 (TYO):** Ita piyong ayonga agitsü renemba Poshan Maah shilem ama, Hokolbarnü (10.09.2021) Social Welfare Department, Phek-i CDPO office meeting hall nung cooking competition ayonga agiogo. "Preparation of Nutritious Food locally available fruits and vegetables" omen nung ajemdaker iba sentong agia liasü, ta sangdong ajanga metetdaksü.

Iba sentong nung, teküboklen agüja aliba telok temi shilem agiogo.

1. Vekuhu SHG
2. Phek village AWW
3. Women SHG Federation

Phek Block  
4. Phek Town AWW  
5. Kuphulu SHG Ketsapo  
6. Ketsapo Village AWW  
Iba tetoktepa sentong nung tetendanger temji Er. Mechietsho Koza, EAC Phek, Heipeuding Illunglang, BDO Phek aser Azenuo, District Health Mobilizer, CMO office Phek nung liasü.

Kasa anogo New Jalukie, Local ground nung, Department of Social Welfare, Jalukie ICDS Project-i block level cooking competition ka ayongzük. Iba sentong nung Project Coordinator Peren, Kulule menden liasü, ta sangdong ajanga metetdaksü.

CDPO Jalukie, Namhuheing-i, temang nung teyari balala agütsüba chiyongsü shitak achi-ajemba indang nung jembi aser mozü mamshi züsentetba süngolemba süngjanglijang ajanga temang nung yariba indang tongtibangtem metetdaksü liasü.

Iba sentong nung, Jalukie town AWWs & Helpers ajanga mezüing jenjang angu. Kasa mapang, Mhainamtsi aser Jalukie B nati tanabuba aser tasembuba; aser SHG Kariugai, New Jalukie-i jenjang pezübuba ngutet. Iba tetoktepa sentong nung, New Jalukie nungi Anganwadi Centre 43 aser SHGs 2 agi shilem agiogo.

**Security Forces-i tesem balala nung medical camp ayongzük**

**Dimapur, Rongjui/September 11, 2021 (TYO):** Honibarnü, HQ IGAR (North) kübok Ghaspani Battalion - Assam Rifles puri New Chumukedima, Vihoku, Tsiphema, Jotsoma aser Zubza yimtsüngtem, Dimapur aser Kohima District nung Health Check Up Camp ayongzük. "Stay Fit Stay Healthy" omen nung ajemdaker iba sentong ayongzük liasü, ta sangdong

ajanga metetdaksü. Iba Health Check Up camp shilem ama, item yimtsüng nung taa magi yimertem medical check up agia liasü aser parnok dang COVID -19 wara nungi jenboa alitsü asoshi tekümdangtsü meratem nung anidaksü ajungshiogo. Kasa mapang, team-i yimertem nem tejak nembangba mask aser shiranger nem pei timtem dak apet mozü angati lema agütsü.

Iba health check up camp nung tanur 108 aser tain 169 shi ajangzükogo. Covid-19 dak sedakba meratem talisa social distancing' tetuyuba nung anidaka iba camp agia liasü. Nübur nungdakba ajiteta iba Camp ayongzükba asoshi yimertem Assam Rifles dang pelaba metetdaksü. Iba Camp temer sülen Assam Rifles-i telok nem süngo jemdakja liasü, ta kasa sangdong nung shia lir.

*Kanga Pelar*



ASO:  
18/10/1951

ASÜ:  
08/09/2021

**Asür ODINENLA  
Aitlenden Ward, Tuli**

Onoki teti meima aliba temeim kinungsü/tsürabur Asür ODINENLA, W/o. Shir. I. Toshi Lkr (Kangtsüng) Aitlenden Ward, Tuli Town, manemi shirang yipden nung mapang talangka lia arur 08/09/2021 anogo nung iba akümlü wadang doktsür tatem makaba limai aoba anogo tashi nung Sensosanger, temba tinu aser temeimer kija kibong kwikati nübo, rongsen, sarasadem aser taküm shisatsü agi nungita yaria arugo, nenok ajak dangi onoki tsüingdong arua majurteptet nung iba oren tatsü ka ajanga ajak dang KANGA PELAR ah-ni ta asüba lemsateper.

*Tongtipangsa tenüing metetshiang melitnung item loktitem danga kangasa pelaba lemsateper;*

1. Kangtsüng Senso Telongjem Tuli.
2. Kangtsüngsür Telongjem Tuli
3. Kangtsüng Senso Bendanglen Alir Telongjem
4. All Ward Union, Tuli Town
5. Aitlenden Ward, Tuli Town
6. Dimapur Kangtsüng Senso Tamang Telongjem
7. Aitlenden Baptist Arogo, Tuli
8. Aopenzü Baptist Arogo.
9. Kangtsüng Baptist Arogo.
10. Kangtsünyimsen Baptist Arogo
11. Dr. N. Benjungliba Aier.

Nenok sarasadem aser mapa tajung asoshi teyanglur Tsüingremi maneni moajangma ta onok tamang sarasadem.

*- Temeim Kinungbo, Chirurtem aser Anükapang.*

**MOLUNGNEN O**



Aso : 27.07. 1929

Asü : 08.09.2021

Sept. 8, 2021 anogo nung onoki kanga dang meima aliba asür **TSÜKNUNG MEREN JAMIR** (Ex-Pastor Molungyimsen) taküm tajung anema lia dang ajongbena Khristar tajaba arua akümlü wadang tempanger teti alitsü limai ogo. Pa taküm alidang Phom, Konyak aser Naga Burma lima nung aser taso yimkong Molungyimsen Arogo nung ta Tsüingrem mapa nung küm ajak agi 48 inyaker anisüingzuka lia kecha meshirangi ajongbena dang Kibubai jar ao. Akümlir den pa asü pila mapang nung kinunger, adianutem, kiyonger, yimtsür yimer, tembartem, kija, kibong aser lokti balala shirnokisa ozü asükhu mapang nung nübu rongsen den sarasadem den maparen balala nung yaritepogo nenok ajak dang kangasa pelaba lemsateper. Nenok mapa tajung asoshi tanü ozü nenok nem kecha meyipba magütsüteter, saka takar Tsüingremi nenok ajak moshia moajang ta sarasadema adar.

*- Temeim Kinungsü, Chirurtem & Semchirtem.*

**Dimapur Area Chuchuyimlang  
Senso Telongjem  
KONANG AGÜJA TUSHIR**

Wabong N. Temjen aser Watsu Chubala na jala kongro **TIAMENLA**, shibai Staff Selection Commission (Central Police Organisation) tatitang ajanga DELHI POLICE nung **SUB INSPECTOR** takok ngugo, sensosanger ajak pelar. Nübur tenzükba peyong takok madak lidakjang ta sarasademtsür.



**I. Sungit Ao  
President, DACST**

**J. Imlimeren  
Gen. Secretary, DACST**

## Phesama Students' Union-i SASU Open Futsal Tournament kokogo



Kohima, Rongjui/September 11, 2021: Phesama Students' Union-i SASU Open Futsal asayamung takok anguba sülen asayartem külemi tangokba noksa ka yangi angur.

**Kohima, Rongjui/September 11, 2021 (TYO):** Jakhama Local Ground nung Southern Angami Students Union (SASU) ajanga 'Rise as one' omen kübok anogo ana ayongba "Ibuba Open Futsal Tournament 2021", Honibar nikongdang takok ngua tembangogo, ta sangdong ajanga metetdaksü.

SASU Open Futsal Tournament final nung Phesama Students' Union-i Soccer Club Kohima madak goal 4-2 agi takok angu.

Iba asaya mezüing half tashi Phesama puri Soccer Club amokbanger asaya liasü aser parnoki goal ana tashi idaktsü. Tanabuba half nung Kohima team-ia meranga asaya goal ana idaktsü, saka Phesama Students' Union-i ano goal ana idakja goal 4-2 agi asaya koktet.

Final tongtettsü atema,

semifinal nung PHU-i goal 5-2 agi Khüateke FC tsükdaksü. Kasa asayamung semifinal tanga ka nung Soccer Club-i Adventure Club madak goal 1-0 agi takok angu.

Takok angur team - Phesama Students' Union nem senpet 30,000 aser runners-up Soccer Club nem senpet 15,000 agütsü. Semifinalist team ana Khüateke FC aser Adventure Club nem senpet 3000 (3000 each) agüja liasü.

Iba asayamung nung goal timba idaktsü, Viluto Achumi (Soccer Club), shibai goal 15 idaktsü, pa nem award agüja liasü. Zakie (Soccer Club)-i Best goal keeper award angu. Tenaprongla nem senpet 1500 agütsüogo. Phesama Students' Union nungi Theja Chuse-i 'player of the tournament' award angu aser pa nema senpet 2000 agütsü.

Anogo ana ayongba asayamung nung Southern Angami tesem aser Kohima nungi team 48 agi shilemagiogo.

Iba asayamung shibangba sentong nung, Medo Yhokha Advisor Technical Education & Elections indang PS, Metekhriezo Patrick Khale tongti tesemdanger ama denogo.

Takok angutsü asoshi team ka ama telongjem alitsü nungdaker aser ibaji asen taküm nunga tatishitsü ka südaktsüsüla, ta Khale-i shilem agirtem ayongzüük.

Alizüing tongtettsü asoshi telongjem ajanga yaritsü aser longjemer inyakba ajanga tasa tasen angazüker, ta pai ashi.

"Team ka ama taküm nung asenok longjemer inyaktsü merangdi, ajiasünungang asenoki timtem balala koktettsü," ta Khale-i ashi.

## National Archery Championship nung Nagaland-i shilem agitsü



**Kohima, Rongjui/September 11, 2021 (TYO):** Taküm October ita Jharkhand nung ayongtsü aliba - 40buba Sahara Senior National Archery Championship nung, Naga nung archer 15 agi shilem agitsü, ta sangdong ajanga metetdaksü.

Honibarnü, Indira Gandhi Stadium Kohima nung Nagaland team atema archer tem shima liasü, kong international archery nung medal angur Kilenmeren aser Kevikieno Rikha na densema archer 19 agi trial nung shilem agiogo.

Iba sentong nung, Olympian aser Arjuna award angur, Chekrovolu Swuro dena liasü aser lai, tajungtiba nung shilem

agitsü asoshi renemshitsü aser taruba Paris Olympic 2024 nung asayatsü nükla tulu yur asayatsüla, ta ayongzüük.

International level nung tokteptsüsa Naga nung dak sempet aser tashi lir, ta lai ashiba mapang, archer temi tajungba asayatetsü aser nübur den State Sorkar teyari ajanga parnoki Olympic medal angutsü teimla lir, ta lai lemsatapa liasü.

Aruya aliba asayamung nung Nagaland Archery team-i tajungtiba nung shilem agitsü imlaa atar, ta Swuro-i lemsatap.

Tebur Recurve division nung teshimtet archer temji Keneisao, Teisovi Lohe, Kilenmeren aser Mathung nung asütsü.

Tetsür Recurve division nung Kevikieno Rikha, Edikunu Rikha, Ruovinuo Theunuo aser Rovine Domeh nung shilem agitsü.

Compound men division nung Thenuhiele, Vehuyi, Ruyonu aser Besuvezo; aser Compound women division nung Vetavolu, Vetolu aser Neikesa Sakhrie nung asütsü.

Teshimtet archer tem maneni Kohima kübok coaching camp nung adentsü aser iba asayamung atema October 2, 2021 nü asayar ajak coach Besuta Vero, Y Kaiyong, Neisevotuo Terhase aser Hunezo Thisa nung den külemi Jharkhand-i aotsü, ta kasa sangdong nung shia lir.

## NCA ajanga metetdaksür

**Dimapur, Rongjui/September 11, 2021 (TYO):** Ibuba Rapid Nagaland State Open Chess Championship 2021, koba September 23 nungi 25, 2021 tashi asayatsü renem, saka mepaidoktetba timtem/mepetmesü kar ajanga iba asayamung anogo atsülanger, ta sangdong ka ajanga Nagaland Chess Association-i metetdaksü.

Iba mepetmesü asoshi onoki sasa bilemer. Ajisüaka, iba asayamung takok ngua agitsü asoshi anogo tetemjen ka shimtsü aser takaratiba nung

osang agütsütsü. Iba asayamung dak sendakba nung osang tejangja agütsü asoshi ph.no. 7005580145, 8837098422 nung tongtepratepang, ta kasa sangdong nung shia lir.

[8:30 pm, 11/09/2021] Wapang Wapz: Kohima, Rongjui/September 11, 2021: Taruba National Archery Championship nung shilem agitsü atema, Kohima nung selection trial' agiba mapang Nagaland Archery nungi coach tem den shilem agirtem külemi tangokba noksa ka yangi angur.

## US Open 2021: Ram aser Salisbury nati tebur tarep final kokogo



New York, Rongjui/September 11, 2021: USTA Billie Jean King National Tennis Center nung U.S. Open tebur tarep final asayar sülen, abilen nungi Runner-ups Great Britain nung Jamie Murray aser Brazil nung Bruno Soares den takok angur Great Britain nung Joe Salisbury aser America nung Rajeew Ram na külemi tangokba noksa ka yangi angur.

**New York, Rongjui/September 11, 2021 (Agencies):** US Open tebur tarep final asaya nung, America nung Rajeew Ram aser British nung Joe Salisbury nati Bruno Soares aser Jamie Murray madak 3-6, 6-2, 6-2 agi takok anguba sülen, tenati men's double title kokogo.

Iba asaya mezüing set nung Ram aser Salisbury naprongla serve nung timtema asaya, kong tenati double fault' pezü angu aser ibaji ajanga Murray aser Soares nati maongka tajung agiba den tenati 'unforced error' ka dang angu.

Ajisüaka, seed pezübuba nung alir tarep Ram aser Salisbury nati tezü metangi game shia nung tajungba melenshia asaya aser Murray indang serve akokba sülen, tanabuba set nung, tenati mezüing serve point ana ngutet.

Murray aser Soares, shibai 2016 küm Flushing Meadows nung aser Australian Open tebur tarep title takok angu, tenati set tasembuba indang mezüing game nung break point asem ngutet. Aji masüidang,

Ram aser Salisbury nati game tenetbuba nung break point mangudang game pezübuba nung Ram aser Salisbury nati break point ka angu.

Iba asaya final akoktsü atema, 2020 Australian Open tebur tarep takok angur Ram aser Salisbury nati tasembuba set nung ace' 5 aser winner' 22 zükloksü.

"Rajeew den longjemer US Open final koktetba ya tesüingmangtsüka aser kü mangdang ataloker asütsü. Tesüiba küm asem nungi pa den külemi asaya aruogo aser asayar tajung ka ama asaya ajunga nung pai kanga nungitta aruogo," ta Arthur Ashe Stadium nung mezüing asayasang Salisbury-i ashi.

"Pa ama külem asayar tajung ka mangutsü," ta Grand Slam mixed doubles title anaben takok angur Ram-i ashi.

"Asayamung tenzüker külen nungi meimlai ka takok tajung ngua asayaogo aser tarutsü nunga longjemer maneni tajungtiba asayatsü imlar," ta Ram-i ashi.

## BILEMDANGANG

"Chiyongtsü jenti liaka, asentzü sendoka inyaker anguba chiyongtsüji tanangba."